

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



Saunia:

OFISA O AOAOGA KERISIANO



VASEGA AMATA – III

AUKUSO – TESEMA

2025

FA'ASOLOGA O MATAUPU O LE TUSI.

ASO/MASINA

MATAUPU

TUSI FAITAU

1. Aso Sa- Aokuso 03, 2025 “O Saulo le ulua’i tupu o Isaraelu” 1 Samuelu 11: 12 – 15
2. Aso Sa- Aokuso 10, 2025 “ Ua filifilia Tavita e avea ma tupu” 1 Samuelu 16: 11 – 13
3. Aso Sa- Aokuso 17, 2025 “Ua avea Solomona ma tupu” 1 Tupu – 1: 42 – 46
4. Aso Sa – Aokuso 24. 2025 “O fanau o mea alofa mai le Atua” Salamo 127: 3 - 5
5. Aso Sa- Aokuso 31, 2025 **“MATAUPU FAAMANATU”**
6. Aso Sa- Setema 07, 2025 “O le Talalelei ia Iesu Toetu” Mataio – 28: 19 – 20
7. Aso Sa- Setema 14, 2025 “Ua le usitai le tupu o Solomona” 1 Tupu 11: 9 – 13
8. Aso Sa- Setema 21, 2025 “ Ua tu’uina Samuelu mo le Atua” 1 Samuelu 1: 19 – 28
9. Aso Sa-Setema 28, 2025 “O le Atua lo tatou leoleo sili” Salamo 16: 1 – 2

10. OKETOPA 05, 2025 – OKETOPA 26, 2025 – MALOLOGA MO LE LOTU TAMAITI – 2025

11. Aso Sa – Novema 02, 2025 “E lava ma totoa le alofa.....” Hosea 11: 2 – 4
12. Aso Sa – Novema 09, 2025 “Saili ma tatalo I leAtua.....” Salamo – 18: 6
13. Aso Sa – Novema 16, 2025 “O mea sili ona lelei e ave.....” Kenese – 4: 4
14. Aso Sa – Novema 23. 2025 “O le tiute o le Kerisiano.....” Kenese – 4: 3

15. Aso Sa – Novema 30, 2025 **“MAIMOAGA A LE FANAU”**

16. Aso Sa – Tesema 07, 2025 “Ua fa’aali le agelu ia Iosefa.....” Mataio – 1: 20 - 22

17. Aso Sa – Tesema 14, 2025 **“MATAUPU FA’AMANATU/ SU’EGA FA’AI’U**

MANUIA LE TAPENAGA

////////////////////////////////////

ASO SA – AOKUSO 03, 2025.

MATAUPU: “O SAULO LE ULUA’I TUPU O ISRAELU.”

TUSI FAITAU: I SAMUELU – 11: 12 – 15.

SINI E TULILOAINA: “Ia a’oa’oina tamaiti ia iloa o Saulo o le ulua’i tupu o Isaraelu, ae aiseā foi na filifilia ai o ia e fai ma tupu, ma ia iloa e tamaiti, e ‘ese mea e mana’o i ai tagata, ‘ese mea e finagalo ai le Atua. “

FA’ATOMUAGA: O le Vasega Amata Lua lenei, e amata mai i le 5 – 7 tausaga. O le fa’amomoe, o fanau ia ua amata ona matala lelei la latou fa’alogo ma taofi mau i mea e fa’alogo ma va’ai i ai. E ui lava ina lē tutusa pea le malolosi o mafaufau, a’o le mea mautinoa o tausaga, ua iloa mea o le olaga. O le vasega lea o le ā amata ai ona talatala atu teisi le malamalama o fanau i tala o le Tusi Paia, ma tagata ta’ito’atasi, e pei ona fa’alauiloaina i le Vasega Amata Muamua. E tumau pea le lagona ina ia lē faigatā i fanau laiti ia le a’oa’oina o tala o le Tusi Paia. O le gagana ma fa’atinoga aupito faigofie, e matuā fautuaina e a’oa’oina ai Vasega Amata uma e lua.

FESOASOANI MO LE MATAUPU.

1. E lelei ona amata i’inei ona fa’amasani le faitau Tusi Paia a le fanau i nai fuaiupu ua tu’uina atu i le Tusi Faitau. Tu’u pea le avanoa e taumafai ai e faitau lava le tamaitiiti ia, ae fa’asa’osa’o e lau Susuga a le faiaoga. Pule lau Susuga pe faitau fa’atasi pe auaua’i le vasega.
2. Mo le mataupu o lenei Aso Sa, e lelei ona e silasila i le mataupu e 10 ma le 11, e manino lelei ai sau tapenaga manaia mo le fanau.
3. Ia manatua, o le mavae o Fa’amasino o Isaraelu, o i latou ia sa pulea Isaraelu i taimi na nofoia ai Kanana. O i’ina na tupu a’e ai le mana’o o tagata ina ia fai so latou tupu, e pei ona faia e isi malō.
4. O Saulo la, na fa’au’uina ai loa e fai ma ulua’i tupu o Isaraelu, e tusa o le finagalo o le Atua ae lē o tagata.
5. O Saulo, o le atalii o Kiso mai le ituaiga o Peniamina. O lona nu’u o Kipea. O ia o se tagata loto maulalo, auā o lona manatu, o ia e sau mai le ituaiga aupito itiiti o Isaraelu. (I Samuelu– 9:20-21)
6. O Saulo o se tagata lotomaulalo ma loto fesoasoani, e tino lelei ma aulelei ma tino malosi, o ia na ta’ita’ia Isaraelu i le taua ma Amoni ma manumalo ai, e fesoasoani iā lapese- Kiliata.
7. Sailiili pea lau Susuga i nisi fa’amatalaga faigofie e fa’ata’u i le avea o Saulo ma tupu o Isaraelu.
8. Tautuana lava ia faigofie le gagana ma upu e malamalama ai le fanau, aua foi le so’ona naunau e fa’amatala atoa le tala, ae ‘oto’oto nai mea tāua e pei ona tu’uina atu i le sini autu, ma sau fa’aopoopo faigofie i ai, ua lava ma totoa lena mo lenei Aso Sa.

GALUEGA FA’ATINO:

1. E fuafua lelei e lau Susuga le taimi ina ia paleni, aua foi le umi i le fa’amatalaina o le tala, a ua lē fia fa’alogo le fanau iā te oe, e tupu ai lou ita. E tāua tele foi galuega fa’atino e fialia ai tamaiti.
2. O fanau ia ua iloa tusi ata, e lelei ona tufa i ai ni pepa, e tusi ai le ata a le tamaitiiti lava ia, ma fa’amatala e ia le uiga o lana ata i le vasega, po’o le a’oga Aso Sa atoa foi.
3. Ia fa’amanino lelei i tamaiti le uiga o le ata o le ā ia tusia, ia feso’ota’i aga’i i le mataupu. Fa’ata’ita’iga: Ia tusi ane se ata o Saulo ma ana teuga fa’atupu. Fesoasoani i ai lau Susuga e ta’u i tamaiti teuga a le tupu, ae tusi e latou, ma nisi ata faigofie mai le tala..
4. Fa’amolemole ia maua le fialia o fanau, ae aua e te ita, pe lelei pe leaga, sa’o pe sesē, ia e fai atu i ai, lelei tele le tama po’o le teine lea. E sili atu lou silasila atu ua toe alu ane i le isi Aso Sa, i lou fiu e fa’atali ua musu si tamaitiiti.

FESILI MA TALII:

1. O ai le ulua’i tupu o Isaraelu? **Tali:** O Saulo.
2. O ai na fa’au’uina Saulo e fai ma tupu? **Tali:** O Samuelu.
3. O fea le nu’u o Saulo? **Tali:** O Kipea.
4. Aisea na manana’o ai tagata i so latou tupu? **Tali:** Fia fa’ata’ita’i i isi malō.
5. Na mana’o le Atua e fai se tupu o Isaraelu pe leai? **Tali:** Leai.

6. Aisea? **Tali:** E mana'o le Atua ia fai pea o IA ,(le Atua), ma tupu i lona nu'u o Isaraelu.
7. O ai le tamā o Saulo? **Tali:** O Kiso.
8. O nai fesili ia e tuliloa e lau Susuga ia tapena ai fanau ia mo le aga'i atu i luma. E lē se agasala le fa'aopoopo e lau Susuga nisi fesili, pe ā talafeagai ma le taimi.

A'OA'OGA:

1. O le ā taoto atu lava i lau Susuga le vaega lea i lou silafia e gafatia e tamaiti ona taofi ma malamalama i ai. A'o le manulauti o le sini autu, ia fa'alogo, manatua, taofi nai fesili amata ia e uiga i le tagata o Saulo i lona avea ai ma ulua'i tupu o Isaraelu.

PESE: Ou te iloa o lau taleni le fatu pese, e lelei ona saunia sina pese pu'upu'u mo le fanau, afai foi e leai, o le vasega tonu lenei e tatau ona amata ai ona a'oa'oina fanau i ā tatou lava pese o le Tusi Pese. O le mea ua mautinoa, ua amata ona lē iloa e fanau a tatou pese. Toe taumafai e fa'amanatu si vaega tāua lea. O le mea e lē natia, ua o'o lava i isi tagata matutua, e lē iloa pese a le tatou Ekalesia, vagana ai pese masani ma usu so'o. I le ma lenei, ua leiloa atu ai ma ā tatou fatuga tuai mananaia o ā tatou pese. O le fa'afitauli, ua leai ni lotu i le aiga i le afiafi. E sili foi ona loloto ma uigā, ma fetau lelei a tatou pese, i tala o leTusi Paia.

Tatalo: E silafia lelei e lau Susuga le mafai ma le lē mafai ona tatalo to'atasi se tamaitiiti o le vasega lea. Afai e mafai, lelei tele, ae lelei ona ta'ita'i e lau Susuga le tatalo ae mulimuli atu le fanau iā te oe.

Manuia tele le amataga o a'oga i lenei lima masina.

////////////////////////////////////

ASO SA – AOKUSO 10, 2025.

MATAUPU: “UA FILIFILIA TAVITA MA TUPU.”

TUSI FAITAU: I SAMUELU – 16: 11 – 13.

SINI AUTU: “Ia taofi i mafaufau o tamaiti le tagata o Tavita na avea ma tupu o Isaraelu, o le filifiliga mai le Atua. Fa'amaite nisi tala e uiga iā te ia. (Tavita).

FESOASOANI MO LE MATAUPU:

1. O le fautuaga, a'o e tapena i lenei vaiaso, ia faitau atoa le mataupu e 16, o i'ina o lo'o fa'amatalaina ai le mafua'aga na fa'au'uina ai Tavita e fai ma tupu o Isaraelu. O le filifiliga lava mai le Atua, ina ua lē usitai le ulua'i tupu o Saulo i le Atua, na lafoa'i ai e le Atua ae fa'au'uina Tavita e fai ma tupu o Isaraelu.
2. Na fa'asolosolo ane le fanau e to'afitu a lese i luma o le ositaulaga o Samuelu, o tagata tino lelei ma malolosi, peita'i, na fetalai le Atua iā Samuelu, na te le'i filifilia se tasi o i latou na. Na fesili Samuelu po'o ua uma mai tama, ae fai ane lese, toe o le ui'i o lo'o i le vao, o lo'o leoleo i le lafu mamoe a le aiga.
3. Sa a'ami Tavita, ona fa'atonuina lea e le Atua Samuelu e fa'au'u iā te ia e fai ma tupu. “Tula'i ia inā fa'au'u iā te ia, auā o ia lava lenā.” O le avea o Tavita ma tupu o le filifiliga lava mai le Atua.
4. Aua le taofia le fa'alateleina o nai manatu na e lau Susuga i se gagana faigofie mo tamaiti, ma nisi fesili talafeagai lelei ma lo latou malos fa'alē-mafaufau.

GALUEGA FAATINO: FESILI MA TALI

1. O ai Tavita? **Tali:** O le atalii o lese.
2. O le ā le galuega a Tavita? **Tali:** O le leoleo mamoe.
3. O ai na fa'au'uina Tavita e fai ma tupu o Isaraelu? **Tali:** O Samuelu.
4. Aiseā na filifilia ai Tavita e fai ma tupu? **Tali:** Ona ua lē usita'i Saulo le ulua'i tupu o Isaraelu i le Atua.
5. E to'afia atalii o lese? **Tali:** E to'afitu.
6. Aiseā na lē filifilia ai le ulumatua e fai ma tupu. Fai mai le tala e tino lelei toe maua? **Tali:** Auā e va'ai le tagata i le tino, a'o le Atua e silasila i le loto o le tagata.
7. Ai foi se manaia ae amata ona fa'amaite i ai igoa o le fanau tama a lese e to'afitu.
8. Tautuanā ia faigofie lau tapenega i le gagana e te fa'aaogaina.

GALUEGA E AVE I LE FALE.

1. Tusi i se pepa po’o latou api, igoa nei e to’afitu i tamaiti, e ave i le fale e fesoasoani i ai lona tamā ma lona tinā, e a’oa’o i fanau. O le galuega e fai fa’atasi a lau Susuga ma mātua.
2. (a). Eliapo. (e). Apinatapa. (i). Sama. (o). Natanielu. (u). Ratai. (f). Osema. (g). Tavita.

TUSIGA ATA. Pule lau Susuga i se ata e fiafia ai le tamaitiiti e tusi i lenei Aso Sa.

PESE: Saunia se pese pu'upu'u e fa'ai'u ai le mataupu.

Tatalo: Fa'ai'u i le tatalo a le Alii e tauloto fa'atasi e le fanau.

Malō le fa'amalolosi i lenei taeao. Manuia le galuega o feagai ai.

ASO SA – AOKUSO 17, 2025.

MATAUPU: “UA AVEA SOLOMONA MA TUPU.”

TUSI FAITAU: I TUPU – 1: 42 – 46.

SINI AUTU: Ia a’oa’oina tamaiti i nisi tala iā Solomona, ma ia iloa e le fanau, o le usita’i ma fa’aaloalo i mātua e fa’amanuiaina ai le tamaitiiti e le Atua.”

FESOASOANI MO LE MATAUPU:

1. E tãua pea le silasila ane i nai tusi ia e fesoasoani mo lau tapenega i lenei Aso Sa. O le Tusi faitau o lenei Aso Sa ma le (ii. Samuelu – 7: 12 – 13).
2. Ina o avea Tavita ma tupu iã Israelu, sa fetalai ane ai le Atua e ala iã Natano le perofeta, e uiga i le tofia o Solomona e fai ma tupu.
3. (ii.Samuelu – 7: 12 – 13), “A fa’aatoatoaina ou aso ma e ta’oto fa’atasi ma ou tamā, ona ou fa’atuina ai lea o so lau fanau, pe ā mavae atu oe, e tupu mai iã te oe, ou te fa atumauina foi lona malō. O ia lava na te faia se fale mo lo’u igoa, ou te fa atumauina foi lona malō e fa’avavau.
4. O Atonia, o le atalii o Tavita, peita’i, na alu ‘ese mai lona tamā ina ua fa’amalosi e ia ona fa’au’u o ia lava, e fai ma tupu, ae lē iloa e lona tamā.
5. Na ta’u e Patisepa le avā a Tavita, ma le perofeta o Natano le mea ua faia e lona atalii o Atonia. Aemaise, na fa’amanatu i ai e Patisepa iã Tavita lana tautoga, e fai Solomona lona atalii ma tupu pe ā mavae o ia.
6. E leai se tala tele ua maua e uiga iã Solomona a’o le’i avea ma tupu. O Solomona, na fa’aigoaina e Natano le perofeta iã letitaia ina ua fanau mai, o le uiga o le igoa letitaia, “ua alofaina e le Atua.”
7. Fai mai le tala sa nofo lava Solomona i tafatafa o lona tamā se’ia o’o ina maliu. O inā lava sa tofia mai ai Solomona e avea ma tupu o Israelu. Na ilia pu ma alalaga tagata ia soifua le tupu o Solomona, ona o le fiafia ua fai Solomona ma tupu.
8. Fa’amolemole ia faigofie le gagana e fa’amatala ai le mataupu, o le tusi e mo lau tapenaga, ae lē faitauina i le vasega.

MEA TĀUA E AO INA ILOA E TAMAITI:

1. Toe fa'amanatu fesili o le mataupu i le vaiaso ua te'a, ma fa'ata'ita'i pea ona faitau le Tusi Paia.
2. E mafai ona fa'amamafa le tāua o le usita'i i matua e maua ai le mea lelei pe ā fa'amatala le tala. E mafai foi ona fa'aopoopo e lau Susuga le tāua o le ava ma le fa'aaloalo pe a talafeagai ma tamaiti. O uiga ia e tataua ona ola ai le tamaitiiti e manuia ai mai le Atua.
3. E ao ina iloa e tamaiti e lua atalii o Tavita. O Atonia le tama matua, ma Solomona. Ina ua toeaina lava Tavita ona manatu lea o Atonia o le ā fa'au'u e ia, ia lava, e fai ma tupu, peita'i, na tofia e Tavita Solomona e fai ma tupu.
4. Ia silafia e lau Susuga nisi o igoa o lo'o ta'ua i le tala, ae pule lava lau Susuga pe fa'amaite i fanau pe leai, ina ia lē nunumi ai nai tamaiti. O le isi la'asaga lenā o le lumana'i.
5. O Penaia: O le atalii o loata, o le ta'ita'i o le 'au Kereti ma le 'au Peleti.

- ## GALUEGA FA'ATINO: FESILI MA TALI.

- PESE:** Saunia e lau Susuga se pese e fa'ai'u ai le mataupu. E fautua atu i le agaga maulalo, e lelei lava a tatou pese o le Tusi Pese e 'anoa mo mataupu.

Manuia le a'oga i lenei Aso Sa, alofa tele atu.

ASO SA – AOKUSO 24, 2025.

MATAUPU: “O FANAU O MEALOFA A LE ATUA MO MATUA.” (tofi)

TUSI FAITAU – SALAMO – 127: 3 – 5.

SINI E FA'AMAMAFAINA: Ia a'oa'o i fana ia teu mau i o latou loto ma mafaufau, lo latou tāua ua avea ai i latou ma meaalofa a le Atua mo latou mātua.

SINA FESOASOANI MO LE MATAUPU:

1. E lē fou lea mataupu i lau Susuga, ae aua foi le avea lenā ma auala e te fa'alē-ano ai i si au tapenaga mo le Aso Sa. Manatu e leiloa pe fa'atoa fa'alogo lea o le isi tamaitiiti i si tala manaia lea. Onosa'i pea fa' amolemole i nai au tapenapenaga ua e masani ai i vaiaso ta'itasi.
2. O le Salamo lenei e masani ona usuina pe ā latalata i latou o ē o a'e i le malumlau i Ierusalema, e ave taulaga e fa'afetai ai i le Atua, ona o fa'amanuiaga a le Atua i o latou aiga. E masani ona fa'atino lea faiga taulaga i ulua'i fua o ā latou fa'ato'aga mai le fanua, ma manu pito lelei mai a latou lafu manu.
3. O le manuia o le aiga i le manatu o le fai-Salamo, o le mea e faia lava e le Atua, ma foa'i mai e le Atua, auā o le Atua lava na te ati'ina a'e le aiga.
4. O fanau la, o i latou o meaalofo na foa'i mai e le Atua i le aiga, mo matua.
5. O fuaiupu o lo'o fa'aaogaina i le asō, o lo'o ta'ua ai le tāua, o fanau ua foa'i mai i mātua. E pei o u fanafana i le lima o le toa. E tula'i mai lana fanau i le lumana'i e fa'aea i mātua ma a'iga, aemaise o Ekalesia.

GALUEGA FA'ATINO:

1. E lelei pea le fa'aauau le faitau tusi a nai tamaiti i Tusi Faitau o lea Aso Sa ma lea Aso Sa. Ia fua lelei foi e lau Susuga le umi o le faitauga Tusi Paia. Ae aua le taotasi i fuaiupu ua tu'uina atu.
2. Ia saunia e lau Susuga mea nei e fa'aali i tamaiti e vave ai ona iloa ma manatua mea o lo'o ta'ua i le Tusi Faitau. (1). o le u poo le ā-u. (2). o le aufana. (3). o le utu.
3. E lelei ona tu'u le avanoa i tamaiti e tusi ane ai e latou ni ata, po'o se lisi o mea latou te fiafia e fai mo mātua. Pe tusi foi se lisi o ni gluega latou te fiafia i ai i le lumana'i.

MANUIA TELE TAPUAIGA O LE ASO SA

TUSI FAITAU – MATAIO – 28: 19 – 20.

1. E masani lava ona fa’alogoina upu o le Tusi Faitau i sauniga o le Aso Sa o le Talalelei. E mafua lea ona o le fa’atonuga lea a lesu Toetu i lona ‘au so’o e fa’avae ai le tala’iina o le Talalelei i le fa’aolataga na ia maliu ma toetu ai, mo le lalolagi agasala.
2. O lona uiga, afai o le fa’atonuga a lesu, o le Talalelei la e tala’i atu e le ‘au- so’o ma tagata Kerisiano e i ai ma tatou, o le tala i le ola. O le tala iā lesu ua toetu mai le oti, o le Atua o lo’o soifua pea, ua tatou manuia ma maua ai le ola.
3. Aua le faigata le fa’amatalaina o le Tusi Faitau fa’amolemole. O lau tapenaga lava i le vaiaso o le ā e lē popole ai pe fa’aapefea ona fa’amatala le mataupu fa’a-faigofie i tamaiti.
4. O le mea tāua lava ia amata ona fa’amautū ile iloa o le fanau i le ala e fa’atāua ma fa’amanatu ai e Kerisiano ma tatou foi le Aso Sa o le Talalelei.

1. Pe afai e lelei tapena lau Susuga a le faiaoga, ua ou manatu ai foi, e lelei ae amata ona fa'ama'ite i fanau laiti ia, le tala i le o'o mai o le Talalelei i Samoa, ae fa'avae i le fa'atonuga lea a le Alii i ona so'o.
2. Ua ou manatu e tatau ona iloa uma e tamaiti uma o le Ekalesia, le tala lea i lona o'o mai i Samoa, ae amata mālīe i nai mea faigofie e fa'ama'ite i fanau.
3. A maua lava le suafa o Viliamu e amata ai le iloa, ua selau pasene, e fua lava e lau Susuga a le faiaoga i le malosi o nai tamaiti.
4. O se fesoasoani tele mo lau Susuga pe ā e silasila ane i le Tusi o le Talafaasolopito o le Ekalesia Samoa, e maua ai ni ou manatu i le vaega lea, ma faigofie ai ona e fuaina le mamafa e a'oa'o atu i fanau, ae aua lava nei tele ma faigatā.
5. Fa'amasani pea le faitau Tusi Paia a le fanau i le amataga o le vasega fa'amolemole. Ia fa'asa'osa'o le fa'aleoina o upu, ma fa'amalamalama ni upu e faigatā tele uiga i le fanau.
6. Ia saunia e lau Susuga ni nai fesili mo le mataupu o lenei Aso Sa. Ia fua lava le faigofie o fesili ia pei o fesili o mataupu ua tuana'i.
7. O le fautuaga lava ia togi tali a tamaiti ma fa'amaumau i lau api. Pule lava lau Susuga pe tali fa'atasi pe taito'atasi. Ia maua le fiafia o tamaiti.

TATALO: Saunia e lau Susuga se tatalo mo le Aso Sa lenei, ae fa'ata'ita'i e le fanau.

SINA FA'ASOA MO LE MATAUPU:

- ## GALUEGA FA'ATINO:

- ## O MEA NA ILOA AI LE LE USITA'I O SOLOMONA I LE ATUA:

1. E lelei le faitau atoa o le mataupu muamua o le Tusi Faitau o le asō, o le ā oa ai lau tapenaga mo le matupu, aua o i'ina o lo'o aumai ai le tala ma'ea o le punoua'i o Hana i luma o le Atua i le tatalo, ia foa'i mai se tama mo ia. Atoa ai ma le tautoga a Hana, na te toe tu'uina atu lava le tama i le Atua e auauna ma faia feau a le Atua i aso uma o lona ola.
2. O le fa'a-auauina ma le fa'ai'uina o le tala lenā lea e i ai la tatou Tusi Faitau. Na foa'i e le Atua le tama iā Hana e tusa o le mana'o o Hana. Na toe tu'uina atu e Hana le tama o Samuelu i le malumalu e auauna ai i le Atua i lona olaga atoa.
3. E malamalama le tala ma manino, ae fa'amolemole ia faigofie ona fa'amatala i le gagana e malamalama ai le fanau.

GALUEGA FA'ATINO:

1. Taumafai foi e fa'amalamalama ni nai upu e fou i fanau mai le Tusi Faitau sa faitauina.
2. Fa'amatala le tala i ni fa'ata'ita'iga faigofie i le olaga o le fanau i aiga, ma ā latou feau masani ona fai. Ona taumafai loa lea e momoli i ai le tala o le Aso Sa lenei iā Samuelu na ave e lona tinā i le malumalu e faia feau a le Alii.
3. E mafai foi ona fa'atino le vaega lea o le tala, pe ā tusa ai ma sou finagalo lau Susuga a le faiaoga. Ae fa'aaoga tamaiti e fa'atinoina ae fa'ata'ita'i e lau Susuga.

O NAI TAGATA I LE TALA E TATAU ONA AMATA FA'ALOGO I AI TAMAITI.

1. **O Elekana:** O le atalii o leroama, mai Ramata – sofimo i le mauga o Efaraima. E to’alua ana avā, o Penina ma Hana. O Elekana o le tamā o Samuelu.
2. **O Hana:** O le isi to’alua o Elekana, e leai sana tama e lē fanau.. O le tinā o Samuelu, na foa’i i ai e le Atua
3. **O Penina:** O le isi to’alua o Elekana, e fai lana fanau,
4. **O Eli:** O le ositaulaga po’o le faitaulaga i le malaumalu.
5. **O Samuelu:** O le tama a Hana na foa’i mai e le Atua, i lana tatalo fa’atauana i le ao ma le po e fia maua sana tama.. Na toe ave pe tu’uina atu e Hana Samuelu e faia feau a le Alii i le malumalu.
6. O le uiga o le igoa o Samuelu: **“Ua fa’afogaina e le Atua”**
7. Fa’ailoa pea e lau Susuga nisi tagata ua lē ta’ua, a ia fua lava i le mafai ona taofi e le fanau.
8. E lelei le saunia e lau Susuga nai fesili e fa’amautū ai tagata o le tala ua ta’ua, ma nisi fesili e te silafia ua talafeagai mo le fanau.

A'OA'OGA FAIGOFIE:

1. Fa'amamafa ma fa'atāua i tamaiti le fiafia e omai i le Falesā i Aoga Aso Sa, ma le lotu ma mea uma e fai mo le Atua, e amata atu i'ina le ola tu'uina atu mo feau a le Alii.

PESE: Manaia le fuaiupu muamua o le pese #157. Fa’amasani ai pea se’ia o’o ina maua uma le pese, pe ā maua taimi avanoa.

Manuia tele le a’oga i lenei Aso Sa, alofa atu mo outou ma tamaiti.

////////////////////////////////////

ASO SA – SETEMA 28, 2025.

MATAUPU: “O LE ATUA LO TATOU LEOLEO SILI”

TUSI FAITAU: SALAMO – 16: 1 – 2

SINI AUTU: “Ia a’oa’oina tamaiti ia iloa ma mautū lo latou talitonuga, o le Atua lo tatou leoleo sili.

SINA FESOASOANI MO LE MATAUPU:

1. O le Salamo o lo'o fa'aalutalaina, o le Salamo a Tavita, o lo'o fa'aailoa ai le agaga fa'afetai o Tavita i le Atua, ona o lona fa'aolaina o ia.
2. O upu amata lava o le Salamo, o lo'o fa'atauana ai e Tavita le Atua e fai ma ona leoleo, e ala lea i le tu'uina atu o lona fa'atuatuaga ma lona talitonuga mautū, e leoleo lava ma fa'aolaina e le Atua ia mai so'o se faigatā.
3. E lē taumate na avea le Salamo lea ma Salamo na pepese ai Isaraelu i ia vaitaimi, pe ā feagai ma fa'afitauli o le olaga, e fa'amanatu ai pea iā i latou, o le Atua lava lo latou leoleo i taimi uma, e pei foi ona faia i taimi o Tavita.
4. E lelei pea le faitau atoa o le Salamo e malamalama ma faigofie ai lau tapenaga mo le Aso Sa.

GALUEGA FA'ATINO:

1. E mafai ona fa’alautele le fa’amatalaina o le fuaiupu. O le uiga o le manatu, ia lē taotasi i le Tusi Faitau, ae mafai ona fa’amatala i tamaiti le tāua o le upu leoleo, ma le galuega a le leoleo e fai, se’ia taunu’u lava i le ‘auga o le mataupu, o le galuega fa’aleoleo a le Atua iā i tatou.
2. E lelei ona i ai ni pepa ma penitala a tamaiti, ona fai lea i ai e tusi ane ni galuega a le leoleo latou te iloa.

TUSI FAITAU – KENESE – 4: 4.

SINI AUTU: Ia fa’amamafa i tamaiti, ia iloa i lo latou tutupu a’e, e tāua le faitaulaga ma foa’i meaalofoa i le Atua, ma isi tagata.

SINA FESOASOANI MO LAU SUSUGA A LE FAIAOGA:

1. Masalo o le ā e faitio mai foi i si tusitala, ua tutusa Tusi Faitau o le Aso Sa ua mavae ma lenei Aso Sa. Ia e lē afaina lea, ae tau lava ina sōsō atu i le agaga maulalo, o le ‘oa atili lenā o lau tapenaga mo tamaiti, a’o fa’amamafa, o nai fea’u tāua ia o lo’o fia momoli i le fa’alogo a fanau iti ia mo le lumana’i.
2. O le fa’amamafa o lenei Aso Sa ia fiafia e faitaulaga ma foa’i meaalofo mo le Atua.
3. Taula’i lau silasila i le fuaiupu o lo’o fa’amamafa atu (f: 3), o lo’o i ai upu ia, “Ua o’o ina atoa o aso,” ona avatu ai lea e Kaino o le fua o le fanua o le taulaga i le Alii.
4. “Ina ua atoa o aso,” o lona uiga, ua matua le fa’ato’aga, ua o’o i aso e tataua ona selesele ai. Le tāua lenā o le mea na faia e Kaino, ua selesele le fa’atoaga, ua matua ona fua, e fai ai le taulaga i le Atua, auā o le Atua na fa’amanuiaina le lau’ele’ele ma fua ai lana fa’atoaga.
5. E ui lava la ina lē talia le taulaga a Kaino, a’o le fa’amamafa o le mataupu, ia iloa ona foa’i meaalofo ma faitaulaga e fa’afetai ai i le Atua, e ona manuia ua manuia ai taumafaiga uma a le tagata i mea ua foa’i mai e le Atua.
6. O le agaga lenā o le Aso fa’afetai i le Aso Tofi, e fa’amamafa i tamaiti, o le tiute o le Kerisiano, ia ola faitaulaga ma foa’i meaalofo mo le Atua ma isi tagata, o le ata o le fa’aaliga o le loto fa’amalieina ma le fa’afetai i le Atua, auā o ia le pogai o mea lelei uma e manuia ai le tagata.

GALUEGA FA'ATINO:

1. Afai na o ane tamaiti ma ni fua o fa’atoaga, o le ā matua malamalama lelei lava la si fanau i le mataupu sa e lailoa ai e fa’amatala.
2. Fa’amalamalama lelei i tamaiti, a matua le fa’atoaga, ave se maukeni ma se ‘ato talo ma le Faifeau, o le uiga lenā o le faitaulaga i le Atua. E lē o le Faifeau le Atua, a ia malamalama, o le Faifeau o lo’o fa’ailoa maia le finagalo o le Atua i tagata, ma tatalo i le Atua e fa’amanuia a latou fa’atoaga ia fua lelei.
3. E lē gata i le faifeau, a ia fiafia foi e foa’i mea alofa mo isi tagata, auā o lo’o silafia e le Atua ma fa’amanuia i latou i so’o se ala.
4. Fa’amamafa i tamaiti a’o fai lenei fa’atinoga, o le faitaulaga ma foa’i meaalofo mo le Atua, o le tali fa’afetai lenā a le Kerisiano i le alofa lē fa’amatalaina o le Atua i aso uma. Ta’u i tamaiti, e lē taitai ona tutusa ma lava ā tatou foa’i ma taulaga, e tali ai le tunoa o le alofa silisili o le Atua.
5. Afai e tele le seleselega a lau vasega, ia fai sau fa’asoa ma fa’ata’ita’i i tamaiti ona o e tufa ma fa’asoa i tou faiaoga, ia po’o nisi foi o le aulotu ua o’o ane i le Falesā ae le’i ma’ea le aoga o lenei aso. E lelei foi ona ta’u i nai tamaiti ni upu faigofie e momoli ai meaalofo e amata fa’amasani ai i lea aga, ua amata ona lē iloa e tamaiti fa’atino. A ia latou iloa ai foi le upu o le ā tali ane ai le tagata o le ā o’o i ai le tufa.
6. O le a’oa’oga sili lea o le mataupu, o le foa’i ma le talia i le agaga o le fa’afetai, e lē tataua ona uma.

TAULOTO: O le galuega lava lenā a le fanau mo le aiga e fesoasoani i ai matua. O le fuaiupu e 3, ia fai lenā ma tauloto, e fa'amanatu pea mo i latou i Aso Fa'afetai i tausaga uma.

PESE: Afai na e tapena mo se pese o le Aso Faafetai, ua matuā ‘ova lava lau Susuga i le masina, ae afai ua galo, o le Tusi pese a tatou le tali lelei o so’o se pese talafeagai, a’o le fa’amoemoe ia amata ona fa’afiafia tamaiti i ā tatou lava pese.

TATALO: Saunia e lau Susuga se tatalo e fa'ai'u ai le mataupu, ma talosia atu ai le Aso Fa'afetai i le Aso Tofi, ma fa'amalosi i tamaiti e o ane i le lotu.

Manuia tele le Aso Fa'afetai i lau Susuga ma le fanau..alofa tele atu.

////////////////////////////////////

ASO SA – NOVEMA 30, 2025

MATAUPU – MAIMOAGA A LE FANAU

SINI – Ua manatu fa’atasi ma le tusitala o le vasega amata muamua, o le ā fa’aavanoa le Aso Sa lenei e alu ai le maimoaga a le fanau. O le taofi, se’i ave nai fanau i se isi foi si’omaga e ese mai le Falesa i lea taeao. E fautuaina lava e amata lava i le lotoā a le tou ‘aulotu, po’o se isi foi vaega o le nu’u pe ā talafeagai ma le taimi. O le

E le faamalosia ae a talafeagai mo lau Susuga, e le se agasala ni nai chips ma nai juice mo nai tamaiti ona toe foi fialia loa lea I le sauniga.

[illegible]

TUSI FAITAU: MATAI O – 1: 20 – 22.

1. A’oa’o ma faitau le Tusi Paia a i tamaiti, amata le tou faitauga i lenei Aso Sa i le fuaiupu e 18 – 25.
2. O fuaiupu ua filifilia mo lenei mataupu, o le fa’amatalaina o le fa’aali mai o le agelu iā Iosefa i le miti: O mea nei o lo’o ta’ua i le miti: 1. Aua e te fefe. 2. Aumai iā te oe o Maria lau avā. 3. Auā o lana to mai le Agaga Paia lea. 4. E fanau mai e ia le tama tane. 5. E fa’aigoa foi iā te ia o Iesu. 6. Auā e fa’aola e ia lona nu’u ai ā latou agasala.
3. Ua vaevae atu fa’afaigofie ona fa’amatala vaega o le miti. O lo’o ta’ua ai foi ma le uiga o le igoa o Iesu, **“O le fa’aola.”** O le fa’amamafa atoa lea o le mataupu o lenei taeao, ia a’oa’oina nai tamaiti i le miti a Iosefa na fa’aali ai le Atua e uiga i le fanau mai o Iesu.
4. A maumautaia nai mea ia ma le uiga o le igoa o Iesu, ua lava ma totoe fa’alumaga o nai fanau i lenei Aso Sa, a’o aga’i atu i le Kerisimasi.
5. Aua le vaoia ai lau tapenaga, saili pea le fa’alauteleina i le faitauina o le Tusi Faitau, ma fatufatu ai manatu ma le gagana faigofie mo le fanau i lona fa’alautelega.

1. E lelei ona tou talatalanoa i miti. Fesili i tamaiti po’o le ā so latou iloa o lea mea, e fa’apefa ona tupu, a’o le ā le taimi e masani ona tupu ai, ma nisi lava manatu. Afai na tupu i se tamaitiiti, tu’u i ai le avanoa e fa’amatala ane ai lana miti, a o le ā se lagona na o o iā te ia, pei o le fefe ma isi lagona fa apenā.
2. Ona e taumafai loa lea e ta’u i ai, o le auala tonu lenā o lo’o fa’ailoa mai i le tala, na talanoa ai le Atua ma Iosefa, pe na fa’aali ai le Atua iā Iosefa, o le miti.
3. Fa’ailoa i tamaiti le taunu’uga po’o le uiga o le miti, o le pepe po’o le tama o le ā fanau mai iā Maria lana avā, e fa’aigoa iā Iesu, o lona uiga o le fa’aola, auā e fa’aola e ia lona nu’u mai agasala.

1. Tufa i tamaiti ni pepa e tūsi ane ai se ata o Iosefa, o lo’o ta’oto e moe, ma se agelu o lo’o fa’aali ane iā te ia le fe’au mai le Atua e uiga i le fanau mai o Iesu.
2. E lelei ona fa’amatala a latou ata, e ala i le tusia o ni upu i talane o ata, e pei o le nei, afai o Iosefa, tusi ai i talane le igoa o Iosefa o loo moe, ma fa’apena ai lava.
3. Fa’ata’ita’i e lau Susuga le fa’aleoina o le tauloto i fanau ae fa’amausalī le maua mai le fesoasoani a ona mātua.

1. Iesu – O le Fa'aola.

Malō le galulue, fa'afetai le onosa'i..manuja le tu'uaga.

Upu Fa'ai'u: Faia lou tagata ma fofoga o le Ofisa, e momoli atu le fa'amalō ma le fa'afetai iā outou Susuga i faiaoga o le Vasega amata lua. Fa'afetai tele le onosa'i, malō le galulue.

A'o alo atu i le tu'uaga ma malōlōga o aso fiafia, matou te momoli atu fa'amanuiaga ma alofa'aga, i Susuga i Toea'iina ma Faletua, Susuga i Fa'afeagaiga ma Faletua, aemaise o faiaoga na gapātia i lenei galuega. Ia maua se Kerisimasi fiafia ma se Tausaga Fou e tumu i manuia, i le agalelei mai o le Atua.

Tatou feiloa i le Tausaga Fou pe ā pule alofa le Atua tatou te aulia, ma sopo atu i ai lo outou soifua ma lo matou ola. Manuaia tele le Kerisimasi ma le Tausaga Fou - 2025

Soifua ona o Iesu.

